

Paur kute Ximoximã pi'ôk kumrêx no'ôk ne ja.

Paur ne krabê Ximoximã pi'ôk no'ôk ne. Mÿjkôt ne o kra? Jejukôt. Kute kum arênh nhym kute tu amim markumrêxkôt ne o kra. Nhym kam arkum aben kînhkumrêx ne.

Nhym kam Paur kumrêx ne krîraxbê Epexukam bôx ne kam ar memã Metîndjwÿnh'ã ujarênh ba ne kam tê. Nhym kam Ximoxidjwÿ arÿm kam bôx. Kam tên bôx ne kam ar kam memã 'ã ujarênh ba, memã Jeju jarênh ba. Nhym me kwÿ arÿm prîne amikajmâtã Jeju ma. Nhym bep ar kwÿ ne ar arîk 'êx ne kute amijo Jeju mar. Ar kute mar kêtumrêx ne arîk 'êx ne memã mÿjja jarê. Nãm we ar,

—Kwârîk wãnh abenwÿr môr kêt, ane. Ne,

—Mrywã kur kêt, ane. Nãm ar ã kupa'ã me akre ar o bao ane. Ar ja 'ã ne Paur Ximoximã kum,

—Dja ga akabêno ar ity gê ar anhikrê, ane. Ne kam ajte me kute amim Jeju mar'ã kum karô ne kum,

—Ê, Jeju nhô me jao ba djwÿnhmê me atâri âpênhjamê gêdja ar katât mrãn memã Metîndjwÿnh'ã ajarê, ane. Ne kam Ximoximãdjwÿ kum,

—Ê, gadjwÿ, gadjwÿ dja ga katât mrãn Metîndjwÿnh kabênkôt prîne memã arê, ane.

Ne kam ajte me'ã kum karô, me Metîndjwÿnh kabênkôt katât mrãnhmã, me mymê me niremê me ari memã âpênh kajgo ar bajamê me 'uwtimê, me kunĩ. Me kunĩ ne me Metîndjwÿnh kabênkôt katât mrãnhmã ajte Ximoximã me'ã karô. Ne kam me'ã kum pi'ôk no'ôk ne kum ano. Tãm ne ja.

1 ¹⁻² Akmere Ximoxi, ba ibê Paur ne ba amã pi'ôk no'ôk ne. Ximoxi, ikra djwÿnh, amã ne ba pi'ôk no'ôk ne. Ije amã Jeju jarênh ga tu aje amim markumrêx kôt ne ba arÿm ajo ikrakumrêx ne. Ba ibê Paur, ne ba amã pi'ôk no'ôk ne. Djãm ba ne ba Jejumã idjâpênh? Kati, Metîndjwÿnhmê Kritu Jeju ar ta ne ar imã idjâpênh jarên ijano, ije memã 'ã idjujarênhmã ijano. Metîndjwÿnh, kute gu bapytâr djwÿnhjamê Kritu Jeju gu baje amiwÿr kam amakjamê, ar ta ne ar imã kabên jarê ba kam arkum idjâpênh iba.

Be, gê Metîndjwÿnh ajo djuw mex. Kritu Jeju gu banhô Bênjadjwÿrmê Bãmbê Metîndjwÿnh ar ukaprikôt ajo djuw mex ne ar ajo ba. Gê arkum akapri ne amã umar mex jarê, ga kam adjumar mex ne ar aba.

Kute Metîndjwÿnh kabên jarênh djwÿnh 'êxnhî bôxmã arênh.

Rô 16.17; Xim k 6.3; Xit 1.10

³Ë, dja ga arek Epexukam djan nêje ar kukrà. Wãnh ne ar kwÿ arîk kupa'ã ar memã arênh ba, Metîndjwÿnh kabên kupa'ã ar memã arênh ba. Dja ga nêje akabêno ar ity. Nã bãm itêm kutã, pykabê Matenimã itêm kutã amã ikabên jarên kam arÿm ajbir ajte ar'ã amã pi'òk no'òk ne ano.

⁴Dja ga arkum,

—Kwärik wãnh ar me tûmre'ã ujarênh kajgomê me akukãmäre nhidji me kute tûmràm abenmã arênhja kwärik on wãnh nõ. Kôt ne me abenmã kabên ar ban kam me kute amim Metîndjwÿnh mar ne 'ãno ãm kêt. Tãm dja on wãnh nõ, ane.

⁵Akmere Ximoxi, mÿj kadji ne ba amã ikabên ja jarê? Bir, me kum aben jabê kadji. Godja me ôkre kadjwÿnhbê axwe 'ô nõr kêt ne kute amikam axwe 'ô mar kêt kam arÿm kôt kum aben jabê. Ne kam ajte me kute mrãmri amim Jeju markumrêx kôt ne me kum aben jabê. Kadji ne ba amã ikabên ja jarê.

⁶Bir be, me kwÿ arÿm kute ja mar prãm kêt kam arÿm kabên kajgoo kumex, ne abenkam kangao kumex. Jabit ne me kuma. ⁷Djãm me ja kute mÿjja mar got. Kute Môjdjê kukràdjã mar kêtjakam kukràdjã kupa'ã ar memã arênh ba. Ar ta ne ar amijo memã mÿjja'ã ujarênh djwÿnh ne. Ne kute memã,

—Mrãmri ne ba ije me amã arênhja. Kôt ne ba me amã arê, anhÿr ar o ba. Bep kati, ar kute ta amikabên mar kêt ne Môjdjê kukràdjã mar kêt.

⁸Be, Môjdjê kukràdjã ne mexkumrêx. Gu arÿm kuma. Ne ren ar kuman kôt ar amijo ba nhym arÿm rãn mexkumrêx. Nhym bep kati, ar ja kute mar kêt ne ar kupa'ã memã arênh ar o ba.

⁹Be, nhÿnh me jamã ne Môjdjê kukràdjã? Djãm me kute katàt amijo bajamã? Kati, me kute axweo amiptàrjamê, me amakkre kêtjamê, me kute Metîndjwÿnh mar prãm kêtjamê, me axwejamê, me kute mÿjja punubit mar prãmjamê, me kute Metîndjwÿnh japrÿjamê, me kute nãmê bãm ar parjamê, me kute me parjamê ¹⁰me prô nâr mjên prãmjamê, me my ta kute aben nînh ba jamê, me kute mekbê krao àkînhjamê, me 'êxnhîjamê, me kute me kà mex jarênhjamê, nâr me kute mÿjjao amiptàr, Metîndjwÿnh kute katàt memã amikukràdjã jarênh ne mekbê mÿjja puma nhym me kute o amiptàrjamê. Me ja kunî kadji ne Môjdjê kukràdjã. Gu arÿm kuma.

¹¹Nã, Metîndjwÿnh amikabên nykôt katàt memã amikukràdjã jarê. Djãm kabên ny punu got. Axwe mextire. Metîndjwÿnh ne mexo, umao me rer mex ne. Nhym kabên nydjwÿ ã mexo, umao ane. Nhym kam ta, Metîndjwÿnh kînhtire ta ne imã amijã ujarênh ny jarên ijano ba kam ô'ã memã arênh ba, memã 'ã idjujarênh tẽ.

Kritu kum Paur kaprî ne kute àpênh 'ã mênh.

¹²Ë, akmere, mrãmri ne Kritu Jeju gu banhô Bênjadjwÿr amim idja. Kum idjàpênhmã ne amim idja. Nãm amikajmã'ã ima, ije 'ã ingrà tÿx ne kanga kêt mã kôt tu iman amim idjan imã idjàpênh jarê.

—Dja ga imã apê, ane. Ne kam kadjy imã tỳx jadjà ba kam kum idjapênh mex ar iban kôt kum amikĩnh jarê. Mrãmri ne Kritu Jeju imã mexkumrêx ba kam kum amikĩnh jarê.

¹³Amrêbê ne ba Jeju japrỳ ar o iban arĩk ũno iban Jeju nhõ me jao ibikênhõ iba. Nã bãm te Jejukam ijaxwe nhym tu kum ikaprĩn kam amim idja. Nã, mrãmri ne tu kum ikaprĩ. Kraxje ije amikajmã'ã Jeju mar kêtka ije amimar kêt nhym bi kum ikaprĩ. ¹⁴Nãm gu banhõ Bênjadjwỳr tu ukaprĩkôt kum ikaprĩ raxkumrêx ne prĩne ijo djuw mex. Djãm ukaprĩ kêt got. Kum ikaprĩ rax ba arỳm jakam ije amikajmã'ã amim markumrêx. Ije amikajmã'ã Kritu Jeju markumrêx ne imã abê:kumrêx.

¹⁵Ê, mrãmri ne me abenmã kum,

—Kritu Jeju arỳm pykamã ruw, kute me axwe pytarmã ne ruw, ane. Mrãmri ne me abenmã arê. Kabên ja dja me tu markumrêx ne amijamakkrekam kunhõ. Be, kute me axwe pytarmã ne pykamã ruw.

Ba ne ba ijaxweo me axwe kunĩ jakre. ¹⁶Te ijaxwe rax nhym bi kum ikaprĩ rax ne. Jeju Kritu kute akrãnmã meo tēm nhym me kute mar kadjy. Te ijaxwe raxo ije me kunĩ jakrenh nhym mã Jeju kute akrãnmã prĩ'ã ijo tēmja pumũ. Mỳkam? Godja me'õ kute ijaxwe pyrãk ne kute Jeju japrỳ jabej dja ikôpdji'ã ã ikudjwa anen tu amim Jeju kamnhĩxkumrêx ne kam ikudjwa tyk nhijukri tĩn rã'ã rã'ã kadjy. Kadjy ne Jeju kum ikaprĩn akrãnmã prĩ'ã ijo tē. Kam ne ba amã,

—Jeju kute me axwe pytarmã ne pykamã ruw, ane.

¹⁷Be, Metĩndjwỳnh djukaprĩja pumũ. Kumã dja me rax jarê. Djãm bēnjadjwỳr ngri got. Dja memã Bēnjadjwỳr rax rã'ã: rã'ã Bēnjadjwỳr rax. Dja tyk kêtumrêx ne. Me kute noo omũnh kêtumrêx ne. Kubê Metĩndjwỳnh pydji. Atemã 'õ kêtumrêx. Kumã dja me rax jarēn kum uma jarēn mex jarê. Dja me kum arēnh rã'ã: rã'ã ne. Mrãmri. Tãm ne ja.

¹⁸Ê, ikra Ximoxi, akmere, ba arỳm amã ikabên jarê. Gora ikabên ja ma. Amrêbê ne me Metĩndjwỳnh kabên jarēnh djwỳnh adjapênhmã akabin prĩne adjapênh'ã amã karõ. Kôt ne ba amã ikabên ja jarê. Ê, dja ga ar ikabên ja man kôt atỳx ne. Ê, ba me abenwỳr prõt'ã atỳx jakre. Ê, gora atỳx. Gora atỳx ne amã me uma kêt ne kàj bē memã Metĩndjwỳnh kabên jarê gē me amikajmãtã kuma. Kute me tỳx kum me uma kêt ne tu kute abenwỳr prõtja pyrãk.

¹⁹Nã, dja ga ã anen Jeju'ã angrà tỳx ne amim mỳjja mexbit man kôt amijo aban kam amikam ajaxwe 'õ mar kêtumrêx ne ar aba.

Nhym bep me kwỳ ne me arỳm Jeju'ã ngrà tỳx kêt ne kôt amijo ba kêt ne kam arỳm kangan amijo ajkê. ²⁰Be, Imenemê Arexãrimê ne ar arỳm Jeju kangan amijo ajkê. Arỳm ne ar amijo ajkê. Kam ne ba arỳm Xatanajmã ar kanga, ar kute Jeju japrỳ kêt kadjy ne ba arỳm kum ar kanga.

2 ¹Be, akmere, ba amã arê ga aman amũ idjô'ã memã arê. Dja me Metĩndjwỳnhmã mã kabên ne kum me kunĩ jarê. Mã ne mete Metĩndjwỳnhmã kabên kute? Dja me kum aben jarēn kum abeno a'uw. Ne kam jãm meo akēx ne me jadjwỳ kum meo a'uw. Ne kôt kum ôdjàn

jarên kum amikînh jarê. ²Nà, dja gu me kum pykakam me bēnjadjwỳr rũnhjao a'uw ne kam ajte me bēnjadjwỳr kry kute meo ba jadjwỳo a'uw.

Mỳkam? Bir, me kute akrànmã me bajo ba gu me badjumar mex ne ar baba kadjy. Kam dja gu me Metĩndjwỳnh kabēnkôt ar baba ne kôt ar amijo baba katàt ne. ³Be, me ã kute Metĩndjwỳnhmã kabēno anhỳrkam mexkumrêx. Kam dja Metĩndjwỳnh mekam kĩnhkumrêx. Metĩndjwỳnh kubê me bapytâr djwỳnh dja mekam kĩnhkumrêx.

⁴Nà, kute me kunĩ pytâr prãmkumrêx. Nãm arỳm memã katàt kabēn nhym me kute tu markumrêxmã. ⁵Nà, Metĩndjwỳnh pydjii ne kam ajte kute Bãm'ã me bamēnh djwỳnh pydjii, kubēngôkre,^a kubê ne Kritu Jeju. Me bajaxwekam ne gu me Metĩndjwỳnh'ỳr babôx kêt ne. Nhym kam kra ta amijo kubēngôkren me bawỳr bôx ne kam Bãm'ỳr me bajo bôx. Gu me kam arkôt baba. Kute Bãm'ỳr me bajo bôx djwỳnh pydjii. Atemã 'ô kêt, kubēngôkre, kubê ne Kritu Jeju.

⁶Jeju ta, kute memã amikangan me kunĩ pãnh tyk, tãm ne amrêbê Metĩndjwỳnh 'ã akati jakre nhym arỳm 'ỳr bôx nhym kam arỳm amijo aptãn memã amikangan me kunĩ pãnh ty, me kunĩ kute mar kadjy. Me kunĩ kute, —Mrãmri Metĩndjwỳnh kum me bajabên kute me bapytãrmã, anhỳr kadjy. Kadjy ne ty.

⁷Kam ne Metĩndjwỳnh ijano ba tẽ. Ba ikumrêx itēm ne ije memã Metĩndjwỳnh kute me utâr jarēnhmã. Jeju kute ijanorkôt ne ba me bajtemdjwỳ'ỳr tēn bôx ne memã kàj bē Metĩndjwỳnh'a ajarê. Nã bãm memã Metĩndjwỳnh kabēn katàtja, 'êxnhĩ kêtja jarê nhym me amikajmã'ã kuma. Kadjy ne ijano ba tẽ. Mrãmri ne ikabēnja. Ijēxnhĩ kêtumrêx.

⁸Ije, ije ar amã Metĩndjwỳnh jarēnh gar aje kum akabēnmã ba ate o akno. Ba akubyn ar amã arê gar ama.

Dja pyka kunĩkôt mete abeno bikprõnhkam me my Metĩndjwỳnhmã kabēn. Dja me prĩne Metĩndjwỳnhmã amijarê. Me mexo mexkumrêx, me kute mỳjja punu 'ô mar prãm kêt, me ja dja me kum kabēn. Nhym bep me ngryknhĩ, me kute kabēno aben japanh, me tãm dja me kum kabēn kêt ne.

Me nire kute akrànmã amijo bamã.

Kô k 14.34; Xit 2.3; Ped k 3.1

⁹⁻¹⁰Nhym me niredjwỳ. Dja me nire kute Jeju marja akrànmã amijo ba mexkumrêx, kwãrĩk wãnh amimex ne me my nokam mrãnh kêt. Dja ga me apijãm ne ar aba. Mỳkam dja ga me akrākàbito mex? Nã gãm me amikakrwỳnhmẽ akunhêrmẽ angãmẽ kubêkà mexmẽ o amimex ne ar

^a2.5 Kritu ne amijo kubēngôkre kute mrãmri ne apỳnh me ô pyka djãri kunĩkôt me kunĩ: bēngôkreja pyràk. Kubê kà jakamẽ me kakrãtykmẽ me babēngôkremẽ ne me kunĩ:

bēngôkre. Me kamrômẽ me kukràdjã kunĩ kubēngôkreo aben pyràk. Jakam dja ga Karô 17.26 jarēn ama.

aba. Me akrākàbit ne mex. Me my nomã amrãnh kadjybit aje amikrã ngrãnh, amikakrwýnh, ne amimex, ja ne punu. Bep kati, me nire kute,

—Ba ije Jeju mar, anhýrja dja apýnh kabên mexo amiptàn o amimex.

¹¹Me kute Metĩndjwýnhkôt abeno bikprõnhkam dja me nire anhikrên nhýn Metĩndjwýnh kabên maro nhý. Akràn mã dja me Jeju nhõ me jao ba djwýnh kabên maro nhýn amijamakrekam kunhõ. ¹²Kwãrĩk wãnh me nire dja me me my jakre kêt ne me mymã kabên jarênh kêt ne. Nhym bep me my gêdja me me niremẽ me mymẽ me akre nhym me nire anhikrên me kabên maro nhý.

¹³Mýkam? Bir, Metĩndjwýnh ne mybê Adão kumrêx nhipêx ne kam atãri nibê Ewa nhipêx ne. ¹⁴Be djãm Xatanaj ne Adão noo akno? Kati, nija ne noo akno. Nhym kam nija arým Metĩndjwýnhkam amikrà. Be, kam ne ba amã,

—Kwãrĩk wãnh me nire dja me me my jakre kêt, ane.

¹⁵Nija ne te Metĩndjwýnhkam amikrà nhym mã Metĩndjwýnh kum me nire jabêkumrêx ne me kra bixadjwýr kutã me utã. Me nire kute Jeju marja gêdja me Jeju 'ãno dja ne mã kum me abêkumrêx ne kute mýjja punu 'õ mar prãm kêt kam gêdja mexo mexkumrêx ne mã me my nomã mrãnh kêt. Godja me ã kute anhýr jabej nhym Metĩndjwýnh me kra bixadjwýr kutã me utã nhym me kra me bĩn kêt ne.

Kute ar kute Jeju nhõ me jao ba djwýnh mã 'ã karõ.

Xit 1.6

3 ¹Be mrãmri ne me aben mã kum,

—Gêdja me'õ kute meo ba prãm jabej, kute Jeju nhõ me jao ba prãm jabej, mrãmri mexkumrêx. Nã, mrãmri mexkumrêx. Nã, kôt ne me kute arênhja.

²Be, mã gêdja Jeju nhõ me jao ba djwýnh kute? Me axwe kêt ne kute amijo ba mextire nhym kam me me'ã kabên kêtja, me prõ pýnh, me bixaêr punu kêt, me kute amipnênh ne ar ba, me kabôt kati, me kute meo djuw mex prãm, me kute memã Metĩndjwýnh'ã ujarênh prãm, me ja gêdja me Jeju nhõ me jao ba.

³Kwãrĩk wãnh me kum kadjwati kangô^b djãnh, me àkrê, me kute kabêno me apanh prãmja, me kute pi'ók kapribit mar ne kute amim o àptarja, kwãrĩk wãnh me ja gêdja me meo ba kêt ne. Bep kati, me ukaprimẽ, me kute umar mex marja dja me Jeju nhõ me jao ba.

⁴Dja me'õ meo ba prãm jabej dja kumrêx amim prômẽ kra jakre, ne arkum mrãnh mextire gê ar omũn kam adjwýnhdjwý kôt mrãnh mexkumrêx. Dja amim ar jao ba mex nhym kra amakke mex ne kabênkôt ar amijo ba nhym kam arým kôt Jeju nhõ me jao ba. ⁵Nok ren me'õja ar meo ban kam prômẽ kra jakre kêt kumrêx ne kam Metĩndjwýnh nhõ me jabit me akre, mã gêdja on? Mã gêdja kam nẽ? Ije, mýkam ne prômẽ kraja ar o ba mex kêt nhym kra jaxwe rã'ã? Ije kum bep nãm ren amim prômẽ

^b 3.3 Mýjja me kute o kôm ne kôt bibãnh kunija, kadjwati kangômẽ uba kangômẽ, mýjja kangô kunĩ ne me kum kadjwati kangô jarẽ.

krawã kumrêx jakren kam ren kôt Metîndjwýnh nhô me ja jakre. Mýkam ne prômê krawã ar o ba kêt ne kam Metîndjwýnh nhô me jabit ar o ba?

⁶Kwãrik wãnh me'ô ajbir kute Jejuo aminhõ ny'ô'ã Jeju nhô me jao ba djwýnh mênh kêt. Mýkam? Bir, kute amiraxo àmra nhym kam ren Metîndjwýnh kute o bikênh karõ dja me kute Jejuo aminhõ ny'ô'ã meo ba djwýnh mênh kêt. Ne ren amiraxo amra nhym ren Metîndjwýnh o ajkê. Mrãmri kute Xatanajo bikênhja pyrãk. Xatanaj kute amiraxo àmra nhym kam Metîndjwýnh kute prîne o bikênhja pyrãk. Ne ren me'ô ajbir kute Jejuo aminhõ ne ren meo ban ren amijo amra, Xatanajkôt amijo amra nhym ren Metîndjwýnh adjwýnhdjwý o ajkê.

⁷Nhym bep kati, Jeju nhô me jao ba djwýnh dja amijo ba mextire nhym kam me kâtãmdjwý kum kînh ne kum mex jarê. Nãm ren arík ar ba nhym kam me kâtãm rãn 'ã kabên ne. 'Ã kabên nhym kam rãn Xatanaj ikôta, Xatanaj meo ba djwýnhja nhikôta.

⁸Nhym Jeju nhô me jao ba djwýnh jatãri me àpênhdjwý dja me katãt mrã gê me me'ã kabên kêt. Dja me kabên mexmê me kabên punuo aben nhikjê kêt. Dja me kum kadjwati kangô' djãnh kêt. Kwãrik wãnh gê me pi'ôk kaprî prãmebit me noo biknor prãm kêt. ⁹Dja me amim Metîndjwýnh kukràdjã markumrêx ne 'ã ngrã tỳx ne. Metîndjwýnh kute me bamãbit amikukràdjão amirítja, kukràdjã tãmbit dja me 'ã ngrã tỳx ne maro ba ne mýjja mexbit mar ar o ba. Mýjja mexbit mar ar o ban kam amikam axwe 'ô mar kêt. Kadjy dja me Metîndjwýnh kukràdjã'ã ngrã tỳx ne ar o ba. ¹⁰Dja me Jeju nhô me jao ba djwýnh jatãri me àpênhja kumrêx kabi nhym me kabên mex ne kam ar kôt àpênh ba. Godja me mrãmri mexkumrêx jabej ne kam arým àpênh ar ba.

¹¹Nhym Jeju nhô me jao ba djwýnh jatãri me àpênh prôjadjwý. Me adjwýnhdjwý dja me katãt mrã gê me me'ã kabên kêt. Dja me me kã mex jarênh prãm kêt. Dja me bixaêr punu kêt ne ar ba. Dja me prîne mrãnh mextiren kabên pýnh ne arê. Dja ã Jeju nhô me jao ba djwýnh jatãri me àpênh prôja ã ane.

¹²Be, Jeju nhô me jao ba djwýnh jatãri me àpênh gêdja me prô pýnh ne. Dja me ô kikre kumrêxkam amim ar ja jakren arkum mrãnh mexkumrêx gê ar omün kam adjwýnhdjwý kôt mrãnh mexkumrêx. Dja me amim krao ba mexkumrêx gê ar kabên mexkumrêx ne ar ba. ¹³Godja me atãri me àpênhja mrãmri àpênh mex ne kam arým memã amimexo amirít nhym me kâtãmja arým me mex pumün kam kum me kînh. Gêdja mekam amikam pijãm kêt ne kãjmã djan tu memã Jeju'ã ajarê. Me kute amim Kritu Jeju mar tũmkam tu memã 'ã ajarê. Bir be, dja ã Jeju nhô me jao ba djwýnhmê atãri me àpênhmê ã ane.

¹⁴Be, nã bãm amã ikabên'ã pi'ôk no'ôk ne amikukãm ano. Dja ba ã wãm kôt tẽ. Nã bãm amim itẽm djã ma. ¹⁵Nãr kon birãm dja ba amikrà ga prîne omün kam

© 3.8 Mýjja me kute o kôm ne kôt bibãnh kunija, kadjwati kangômê uba kangômê, mýjja kangô kunĩ ne me kum kadjwati kangô jarê.

kôt memã arê, me kute mar kadjy. Metĩndjwỳnh kra kunĩ kute kôt ar amijo ba mar kadjy. Kadjy ne ba amã pi'òk no'òk jano. Apỳnh pyka kunĩkôt ne me bakwỳ arỳm amijo Jeju pytã nhym Metĩndjwỳnh arỳm kôt me bajo kra. Gu me kôt arỳm apỳnh banhõ pyka djàri kam aprakamã kôt aben pydji, Metĩndjwỳnh tĩnjakôt mã pyka kunĩkôt aben pydji. Ne me kàtammã Metĩndjwỳnh kabẽn jarẻnh ar o baba, Metĩndjwỳnh 'ẻnhĩ kêt ne kute katàt kabẽn jarẻnhja memã arẻnh ar o baba.

¹⁶Bir be, djãm mỳjja kakrit, djãm mỳjja prẻre, djãm mỳjjao bikẻnh ne gu me arỳm amim kuman kam amim kamnhĩxbẻ ar baba? Djãm mỳjja ngri: got me tebẻ kute mar ne ate krãmã? Mrẻmri ne Jeju ra:xi.

Nãm amijo kubẻngỏkren^d kato.

Nhym Metĩndjwỳnh Karỏ kabin axwe kẻtmã katon kôt memã arẻ.

Nhym kadjy mrẻnh djwỳnhdjwỳ arek omủnh ar o ba.

Nhym me apỳnh me ỏ pyka djàri kàj bẻ memã 'ả ujarẻnh o ajmả.

Nhym me kam pyka kunĩkôt tu amim markumrẻx ne.

Nhym kam Metĩndjwỳnh kàjkwamả o wabi, ỏ kàjkwa mextiremả o

wabi. Ỏ kàjkwa mexo kute pykabẻ mỳjja kunĩ jakrenhjamả o wabi.

Nãm ả Jeju raxo ane.

Kubẻ me kabẽn 'ẻnhĩ pyma.

4 ¹Be, akmere. Anhẻr djwỳnhrẻm ne Metĩndjwỳnh Karỏ arỳm prẻre me bamả arẻ, ne,

—Pyka kute o ino rer 'ẻrkam dja me kwỳ amibẻ Jeju kangan ate amijo ba. Arỳm kum kẻnh kêt ne kam ate me karỏ 'ẻnhĩja kabẽn ma, me karỏ djujarẻnh punubit man kôt amijo ba, ane.

²Nả, mrẻmri me kwỳ dja me me karỏ djỏ'ả me akre. Me ajkwao bit kute Jeju mar ne 'ẻxja, me tẻm ne me ỏkre kadjwỳnhbẻ kute mỳjja punubit markam pijẻm kêt mex ne arẻk 'ẻx ba ne me karỏ 'ẻnhĩ djỏ'ả me akre ne memả kum,

³—Kwẻrẻk wẻnh abenwẻr mỏr kêt. Dja ga me tu akuprẻkumrẻx ne ar aba, ane. Ne ajte mry'ỏ nẻr me àkur djỏ'ỏ mekbẻ uman memả,

—Kwẻrẻk wẻnh krẻn kêt, ỏm omủ, ane. Nhym bep kati, Metĩndjwỳnh ta ne me bamả mry, me badjẻkur djỏ nhipẻx, me baje 'ả kum amikẻnh jarẻnh ne krẻn kadjy ne me bamả ipẻx. Me baje amim Jeju markumrẻx ne kam kôt baje mỳjja marja, me bamả ne Metĩndjwỳnh me banhõ kwỳ krẻn djỏ'ả apỳnh mỳjja nhipẻx.

⁴Be, mỳjja kunĩ Metĩndjwỳnh kute ipẻxja ne mexkumrẻx. Djãm mete mry nẻr djwỳ'ỏ kanga kadjy ne Metĩndjwỳnh ipẻx? Arkati, me kute Metĩndjwỳnhmả 'ả amikẻnh jarẻnh ne tu kute amim byr ne krẻnmả ne ipẻx. ⁵Metĩndjwỳnh

^d3.16 Kritu ne amijo kubẻngỏkre kute mrẻmri ne apỳnh me ỏ pyka djàri kunĩkôt me kunĩ: bẻngỏkreja pyrẻk. Kubẻ kỏ jakamẻ me kakrẻtykmẻ me babẻngỏkremẻ ne me kunĩ: bẻngỏkre. Me kamrỏmẻ me kukrẻdjỏ kunĩ kubẻngỏkreo aben pyrẻk. Jakam dja ga Karỏ 17.26 jarẻn ama.

kabênkôt arým mrymẽ apýnh me badjákur djà mexkumrêx. Mýjja kunĩ ne arým mexkumrêx. Gu me arým 'lã kum amikĩnh jarẽ nhym arým mexkumrêx.

⁶Akmere, dja ga memã arẽ, me kute Jejukôt abeno kamymã ikabên ja jarẽ. Godja ga memã ikabên ja jarẽ arým mrãmri abê Kritu Jeju nhõ àpênhkumrêx. Nà, Metĩndjwýnh kabên ne gu baje tu amim markumrêxja, kôt dja ga arek amijo tẽn amijo tẽn kam atýxkumrêx. Jeju kukràdjà mexkumrêx, tãm ne ga arým kôt amijo tẽn. Dja ga arek kôt amijo tẽn amijo tẽn arým atýxkumrêx. Atýx ne arým Kritu Jejumã adjàpênh mex ne.

⁷Nhym bep me tũmre'lã ujarênh kajgoja dja wãnh nõ. Tãm ne punu. Kati, dja ga prĩne Metĩndjwýnh kukràdjàkôt amijo tẽn. Katàt amrãnh kadjy dja ga arek amijo tẽn arek amijo tẽn kam amitýxmã amijakre. Djãm akràkà'lã ne ba amã ane? Kati, akadjwýnhbê atýx'lã ne ba amã ane.

⁸Mrãmri ne me ĩ kràkà týx kadjybit amijo djuw mex. Ja ne kàjbê mex. Nhym bep me kadjwýnhbê me týxja mete Metĩndjwýnh kukràdjàkôt amijo tẽnkam týx, ja ne mrãmri mexkumrêx, tũmrãm mexkumrêx. Pyka jakam gu badjumar mex ne ar baba kadjy mex. Ne kam ajte batyk nhijukri akubyn batĩnkam kadjy mexkumrêx. Kadjy ne ba amã,

—Metĩndjwýnh kukràdjàkôt amijo tẽn kam kôt atýx, kôt amex, ane.

⁹Mrãmri ne kabênja nhym me abenmã arẽ. Kabên ja dja me tu markumrêx ne amijamakkrekam nhòrkumrêx. ¹⁰Metĩndjwýnh kute me kunĩ pytãr djwýnh, bep me baje amikajmãtã marja ne mrãmri kubê me bapytãr djwý:nhkumrêx. Mrãmri ne gu me amim Metĩndjwýnh kamnhĩxbê ar baba, Metĩndjwýnh tĩnja kamnhĩxbê ar baba. Kam ne gu amikukãm kuman kam badjàpênh rax ne memã arênho tẽn, batyk djà kêt ne memã arênho tẽn.

Metĩndjwýnhmã àpênhkumrêxmã kum 'lã karõ.

¹¹Be, akmere, dja ga apijãm kêt ne tu memã ikabên ja jarẽn memã Metĩndjwýnh kukràdjà jarẽ. ¹²Kwãrĩk wãnh gẽ me amã,

—Ýgẽ, e kum djãm ajabatàn ne ga ar me akreo aba, anhýr kêt. Bep kati, dja ga te ajbir ajabatàn ne mã katàt mrã gẽ me ajã amijakre, me kute amim Jeju marja ajã amijakre. Kadjy dja ga akabên mexbit jarên ar o aban amrãnh mex ne amã me abên amim Jeju markumrêx ne 'lã angrã týx ne aprõ prãm kêt ne ar aba. Dja ga ã ane nhym me ajã amijakren ã akudjwa amijo anhýro bao ane.

¹³Dja ga kàj bê memã Metĩndjwýnh kabên jarên memã Metĩndjwýnh kabẽno amirĩt ne memã kukràdjà jarẽ. Ja dja ga 'ãno adjãm rã'lã ba awýr bõx. Ba ibê Paur dja ba awýr bõx.

¹⁴Amrêbê ne me kute Metĩndjwýnh kabên jarênh djwýnh arým Metĩndjwýnhmã adjan amã,

—Ë, Metĩndjwýnh ne arým amijo apytã ga kum adjàpênhmã. Ta dja amã týx jadjà ga kam atýx ne ar kum adjàpênh aba, ane. Nhym kutã Jeju nhõ me jao ba djwýnh akrã'lã ikra jadjuw, ga kam Metĩndjwýnhmã adjàpênh ar

aba. Kwārîk wānh Metĩndjwýnh kute amim adjarwão abiknor kêt. Memã Metĩndjwýnh kukràdjà jarēnh 'āno dja ne mǎ memã 'ā adjuarēnh aba.

¹⁵Be, dja ga ikabēnja tu markumrêx ne amijamakkrekam anhôn kôt amijo mō. Dja ga ā amijo atēmo anen arým amrānh mexkumrêxo tēn o tē nhym me kunī arým amrānh mexkôt apumūn kôt amā kato. ¹⁶Ē, ajaxwebē amipnēn amrānh katāt kadjybit amima. Gora memã Metĩndjwýnh kabēn jarē. Gora memã arēnh 'āno dja. Godja ga anen arým amiptàn kam o me jadjwý pytà, me kute akabēn maro ýrjadjwý pytà. Tām ne ja.

Mebêngêtemē me 'uwtĩ'ā kum karō.

A Xim 2.24

5 ¹Ē, godja me kute amim Jeju marwā 'ō, mebêngêtte 'ō, me'ōkam amikrà, kwārîk wānh ga kum abēn tỳx kêt ne akrānmǎ kum akabēn ne kum, —Kwārîk wānh ga ā anhýr kêt, ane. Mrāmri ne me kra djwýnh kute bāmǎ kabēnja pyrāk, akrānmǎ kum akabēn. Dja ga me kraremē me nōr nyreo akamyn me adjwýnhdjwýmǎ akabēn mex jarē. ²Dja ga mebêngêxteo anān me adjwýnhdjwýmǎ akrānmǎ akabēn. Dja ga me kra pýnhmē me kurerero akanikwýnhkumrêx ne memādjwý katāt akabēn jarēn mekam apijām ne meo akanikwýnhkumrêx. Dja ga ā me kute amim Jeju mar kunīmǎ akabēn jarēho ane.

³Ē, akmere, ba amā me 'uwtĩ'ā karō, ga amū idjō'ā memã arē. Me kute amim Jeju marwā kute akrānmǎ mebē mjēn tykjao djuw mexmǎ. Me kute amim Jeju marwā dja me me 'uwtĩbito djuw mex. ⁴Nhym bep djām me'ōbē mjēn ty nhym arým kra nār kon tām djwý 'ō arým ta amim o djuw mex ne. Me'ō kra 'ō nā kute amim o djuw mex nhym abatānh ne arým amipānh amim nāo djuw mex ne. Ne me'ō tām djwý 'ō kwatynh 'ō amim tām djwýo djuw mex ne. O djuw mex nhym abatānh ne kam amipānh kwatynho djuw mex ne. Me kute mrāmri Metĩndjwýnh mar jabej dja ā ō kikre kumrêxkam amim me 'uwtĩo djuw mexo anen kam atāri amū me jadjwý o djuw mex ne. Kam ne Metĩndjwýnh arým mekam kīnhkumrêx ne.

⁵⁻⁶Ate gēdja me'ōbē mjēn ty nhym arík ar ba. Nām amidjwýnhbit amiman ar amijo ba. Ne kam kute me'ō tyk pyrāk. Tīnri kute me'ō tyk pyrāk, kute Metĩndjwýnh mar kētkam, arík ar bakam. 'Uwtĩ kajgo ne wā. Kwārîk wānh me wā. Me tām dja gar aje Jeju marwā o djuw mex kêt. Nhym bep atemā me'ō mjēn kubē tyk nhym kam ate: ar ba ne kam amijā Metĩndjwýnh kamnhīxkumrêx ne kam kum kabēn ne kum amijo a'uwn kam ajte jām me jao akēx ne ajte kum meo a'uw. Akamātkammē a'urimē kum kabēn 'āno dja. Me'ō tām ne mrāmri 'uwtĩkumrêx. Tām bit dja gar aje Jeju marwā o djuw mex ne.

⁷Dja ga memã ikabēn ja jarē gē me'ō kra nār kon me'ō tām djwý ōbikwa 'uwtĩo djuw mex. Dja o djuw mex gē me 'ā kabēn kêt. ⁸Godja me kute amim Jeju mar 'ō ta ūrkwā djwýnhkam amim me jao djuw mex kêt

ne kam arÿm mrāmri axwen arÿm Jeju kabên kanga, ne kute axweo me kâtāmja, me kute Jeju mar kêtja jakrenh mex ne.

⁹Ē, ba amã me 'uwtĩ nhõ pi'òk'ã karõ. Dja ga me 'uwtĩ nhidji pi'òk no'òkkam anhõ, me kute amim Jeju marwã kute kôt meo djuw mex kadjy. Ē, kwārĩk wānh me abatānh nybê mjên tykwã kwārĩk wānh me 'uwtĩkôt pi'òk no'òkkam idji nhôr kêt. Kubê mjên tyk bêngêxtebit dja ga idji nhô gê me kute amim Jeju mar meo djuw mex.

Djām ori arÿm 'ã amex 60 apêx jabej? Djām ori mjên tĩnri krô'ã mjên kêt nhym kam kubê mjên tyk nhijukri me kute krô'ã o prõ kêt jabej? ¹⁰Djori kum mÿjja mexbit kĩnh ne ar o ba nhym me kunĩ arÿm kôt omũn abenmã arēnh jabej? Djori amikôpdji'ã kra jakreo tē nhym kudjwa mexkumrêx jabej? Djori ôbikwa kêtka meo djuw mex jabej? Djori prĩne Metĩndjwÿnh nhõ me wão djuw mex ne memã ôdjānh jabej? Djori kum me umar punu kaprĩ jabej? Djori kute mÿjja mexo amiptarkôt kute mÿjja mexbit mar jabej? Djām ori ã kute anhyr jabej mrāmri mexkumrêx, me 'uwtĩkôt pi'òk no'òkkam idji nhõ, me kute amim Jeju marja kunĩ kute me 'uwtĩ jao djuw mex kadjy.

¹¹⁻¹²Nhym bep kwārĩk wānh ar abatānh nybê mjên tykja kwārĩk wānh pi'òk no'òkkam me 'uwtĩ ro'ã idji nhôr kêt. Mÿkam? Bir, ar 'uwtija kute ôbê,

—Ba ikuprÿ gê me'õ iwÿr mör kêtumrêx. Ba tu Kritumã idjāpēnhbit, anhyrja tu o aknon ajte kum me my kĩnh nhym me'õ 'ÿr mör prāme kum Kritu kĩnh kêt ne kubê amijo akēx nhym me arÿm 'ã kabên ne.

¹³Nhym ar kam kum ukangabit ma ne kam kikremã ipôko tē. Djām arkum ukangabit? Kati, nām ar kabên prāmdjwÿ, ne me'ã kabên tē, me pijām djābit, mÿjja punubit jarēnh tē.

¹⁴Kam ne ba memã kum,

—Dja ar abatānh nybê mjên tyk ajte mjên ne kam amim kra mÿ ne kramē mjēno djuw mex ne akrānmã āpēnh ar ba. Be, nã bām ã ar abatānh nybê mjên tykjamã ane. Mÿkam? Bir, me bakurê djwÿnh kute me bajã kabên kêt kadjy. ¹⁵Bir be, Ar kubê mjên tyk kwÿ arÿm Jeju kangan Xatanajkôt amijo ba. Kam ne ba amã arē.

¹⁶Nhym bep me kute amim Jeju mar ni 'õ nār my 'õ ôbikwabê mjên tyk jabej ta dja amim ôbikwa 'uwtio djuw mex. Nhym ate me kute Jejukôt aben pydjija gēdja me'õ 'uwtikumrêx ne ate: ar bajao djuw mex ne.

Me kute kāmã meo ba djwÿnh kamēnhmã.

¹⁷Ē, me jadjwÿ. Jeju nhõ me jao ba djwÿnh kute prĩne meo baja, ar tām dja me kāmã me kamē. Jeju nhõ me jao ba djwÿnh kute memã Metĩndjwÿnh kabēn jarēnh ne kute memã o amirĩtkam āpēnh rax. Me tām dja me mrāmri kāmã me kamēn memã o pānh mex ne. Ar kute memã Metĩndjwÿnh kabēn jarēnh pānh.

¹⁸Kam ne Metĩndjwÿnh kabēn'ã pi'òk no'òkkam memã,

—Mryti kute amã āpēnh ar ba ne kute amã bāygogo 'ykà ka'uko ipôko āmja kwārĩk wānh inhu djuwpre kêt gê ta āpēnh pānh àkur tē. Nām mryti'ã

Metĩndjwýnh nhõ me jao ba djwýnh jakren àkur'ã kum pãnh jakre. Jeju nhõ me jao ba djwýnhmã me kute o pãnhmã. Ne ajte Metĩndjwýnh kabẽnkam ne,

—Me àpẽnh ne pãnh, ane. Me àpẽnh me mǎnhkutã tãm gẽdja memã o pãnh, ane. Kam ne ba amã,

—Dja me Jeju nhõ me jao ba djwýnhmã o pãnh mex, ane.

¹⁹ Ë, mýjja 'õdjwý dja ba amã arẽ. Gẽdja me Jeju nhõ me jao ba djwýnh'ã kabẽn ne arĩk me kâtãm jarẽ ga tu ate akrã. Djãm me 'ẽxnhĩ kêt got. Nhy m bep me'õ ar amãnhkrut nàr kon amãnhkrut ne ikjê kêt ne mrãmri kute noo axwekõt omũnh ne axikõt arẽnh ga kam arým tu 'ýr tẽn kum akabẽn jarẽ gẽ amim kato. ²⁰ Godja mrãmri Jeju nhõ me jao ba djwýnh kute mekam axwe jabej dja ga tu me kute amim Jeju mar nhipõkri kum abẽn tỳx, me kute maro ýrja tĩn prãm ne axwe kêt kadjy.

²¹ Ë, ba amã mýjja 'õdjwý jarẽ. Dja ga tu memã akabẽno aben pyræk. Dja ga tu me kunĩmã axikõt akabẽn.

Ë, Metĩndjwýnhmẽ Kritu Jejumẽ Metĩndjwýnh kute amijo kadjy mrãnh djwýnh pytår ja, ar kute ikabẽn mar ne ikõt kabẽnkam ne ba mrãmri tu amã ikabẽn jarẽ.

Ë, gora ikabẽn ja ma. Ikabẽn kunĩ ma, prĩne ikabẽn ja ma. Ë, dja ga me kunĩmã akabẽno aben pyræk. Kwãrĩk wãnh me umaje anhõkre kadjwýnhbẽ amim,

—Be, inhõbikwa ne ja. Ba kum ikabẽn kêt, anhýr kêt. Dja te anhõbikwa, ga tu kum akabẽn jarẽ, apijãm kêt ne tu kum akabẽn jarẽ.

Nàr kon, kwãrĩk wãnh anhõkre kadjwýnhbẽ amim,

—Be, tãwã ne õbikwa krãptĩ. Ba kum ikabẽn kêt, anhýr kêt. Dja te õbikwa krãptĩ ga tu kum akabẽn jarẽ, amã me uma kêt ne tu kum akabẽn jarẽ. Dja ga tu me kunĩmã akabẽno aben pyræk.

²² Ë, kwãrĩk wãnh ga arĩk aje me kabi kêtka Metĩndjwýnhmã me umjýr kêt, kum àpẽnh kadjy kum me umjýr ne 'ã anhikra jadjwýr kêt. Dja ga anen ano katon tu mar kêt ne Metĩndjwýnhmã me'õ dja nhy m arým mekam amikràõ ba jabej ga kam ga mǎn kute ajaxwe pyræk. Kwãrĩk wãnh ã anhýr kêt ne mekõt ajaxwe kêt. Ga dja ga tu katåt mrã.

²³ Ë, atikkrekam akanẽ prãmka me ga akanẽ prãm ne. Kadjy dja ga uba kangõ kwý ikõ. Uba kangõmẽ ngõmẽ apýnh dja ga o akõmo tẽ.

²⁴ Ë, me kwý ne me axwekam amirĩtkumrêx. Nhy m me kunĩ kõt omũn arẽnhõ kumex. Nhy m kam me memã axwe pãnh jarẽ. Nhy m bep me kwý ne me axwekam amirĩt kêt ne. Metĩndjwýnh gẽdja tũmrãm memã o amirĩt ne memã kum katon memã pãnh jarẽ nhy m me kam kõt omũ. ²⁵ Nhy m me mexdjwý ne me amirĩt ne. Nhy m me abenmã me arẽ. Nhy m me kwý apdju ne. Djãm mrãmri tu bipdjurkumrêx? Kati, Metĩndjwýnh gẽdja tũmrãm memã me mexo amirĩt ne, nhy m me arým kõt omũ.

Me ô àpênh kajgoja'ã kum karô.

Ep 6.5; Kor 3.22; Xit 2.9; Ped k 2.18

6 ¹Ê, akmere, dja ga me memã àpênh kajgo ar bawã, me kute meo pãnh ne amim me pa'amýnh nhym me memã àpênh kajgo ar ba ne kute amim Jeju mar wãdjwýmã arê gê me ô bënjadjwýr kabên kôt amijo ban prïne kabên ma. Mýkam? Bir, me kâtãm kute Metĩndjwýnh japrý kêt kadjy, ne kute Metĩndjwýnh kukràdjãdjwý japrý kêt kadjy. ²Dja ga ajte me memã àpênh kajgo ar bawãmã kum, —Ê, djori ar anhõ bënjadjwýrwã ar akudjwa kute Jeju mar jabej kwãrĩk wãnh gar amã kurê kêt. Djãm ar aje Jejukôt abeno akamykam amã kurêmã got. Arkati. Dja gar tu kum adjàpênh mextire ne ar aba. Mýkam? Bir, ar akamymã ne gar apê. Kute Jeju mar 'õ, Metĩndjwýnh kum abê 'õ, kumã ne gar apê. Kam dja gar kum adjàpênh mextire ne ar aba, ane. ã me pardjamã ane. Ê, gora prïne memã ikabên ja jarên ikabên jao amirĩto aba.

Nêkrêxkôtbit me umarja ne me umar mex kêtumrêx.

³⁻⁴Godja me'õ atemã kabên 'õ jarênho ku'ê prãm jabej arým amijo ajkên kam Bënjadjwýr Jeju Kritu kabên mexja kubê kĩnh no kati ne kam kôt kabên kêt ne. Ne ajte Metĩndjwýnh kute katât gu bakrã pymjýr'ã ujarênha kubê kĩnh no kati ne kam kôt kabên kêt ne. Mrãmri ne 'êx ne amiraxbito amran kam kute mýjja mar kêt mexi. Nãm ajbãn ajmãn me kukràdjã kajgo mex mýr jabej memã akij. Ne kam kabêno me apanhbit mar prãm. ã me kute anhýr ne punu. Nãm me ã anhýr ban kam mýjja kukràdjã'ã ngryk ne abenbê meo bikjêro ban aben japrý ne aben kamnhĩx ar o ban ⁵mã kabêno aben japanh ar o ba. Mýjwã ne arým me ja djumar djã ajmã o nhym me arým katât kabênkumrêxja mar kêt. Nãm me nêkrêx prãme 'êx ne we,

—Be, ba amijo Jeju mar gê inhõ nêkrêx kumex ba kam amimexkumrêx ne, ane. Nãm me ã nêkrêx prãme amim 'ã karõo ane. Kam ne me abenkam axwe ar baja.

⁶Mýjkôt ne me umar mex ne amimex ar o ba? Bir, me kute Metĩndjwýnh kukràdjãkôt amijo ba ne nêkrêx jabej umar kêtka ne me umar mex ne ba. Ne amidjumar mexwão amimex ar o ba. ⁷Mýj ne gu me banhýkam axidjuw. Me batykkamdjwý, mýj ne gu me amýn o banhikwãn ty? Kati, nãm gu me banhýkam banhikwãn ty.

⁸Bir be, dja me banhõ kwý krên djãmê me banhõ kubêkã jabej, mrãmri, me bamãnhkutã. Kam dja gu me badjumar mex ne atemã mýjja 'õ jabej kêt. Metĩndjwýnh dja me bajo djuw mex ne. ⁹Nhym bep me kute amim nêkrêx nãr pi'ók kaprĩo àptàr ne kute o amimexja dja me amijo ajkê. Nãm me nêkrêx prãme ar axwe ba ne kam te kum nêkrêx prãm kêtma ne mã nêkrêxbit ma. Ne kum mýjja kakritmê mýjja punubit kĩnh ne kôt arým amijo ajkê ne kam arým tu biknorkumrêx ne.

¹⁰Bir be, nãm me ã kum nêkrêx nãr pi'ók kaprĩbit kĩnh ne ã amijo ane. Ne arým amijo bikênh mex ne. Mýkam? Bir, nãm me kum nêkrêxbit kĩnh

ne kam ajbit man kam kôt apÿnh axwe djàri kunĩkôt amijo ba. Memã nêkrêx prãm kwÿ ne me arÿm Jeju mar kangan kam arÿm amijo ajkê, kaprĩo prĩne amijo ajkê.

Akubyn Ximoximã kute katàt amijo bamã 'ã karô.

¹¹Nhym bep ga, akmere, ga abê Metĩndjwÿnh nhô àpênhkam dja ga mÿjja ja kunĩmã akre rax ne. Katàt amrãnh kadjy mÿjja jamã akre rax. Katàt amrãnh ne aje Metĩndjwÿnh kukràdjàkôt amijo aban aje amim Jeju kamnhĩxbê ar aban amã me abên aje akrànãmã amijo atêm, kam dja me ajo ajkê ga mã aje akrànãmã amijo atêm ne anhi djuwbôn ar abamã, tãm dja ga ama.

¹²Me kute amim Jeju mar ne kôt amijo tēm ne kute me kute aben rer pyrāk. Me kute aben rerkam ne me tÿx ne prôtohit prôt ne mebê apôx. Kam dja ga 'ã amijakren ã atÿxo anen mã Jejukôt amijo tē, kute me prôtja pyrāk. Gora ga ã anen kam atyk nhijukri atĩn rã'ã rã'ã rã'ã 'ÿr tu abôxkumrêxmã. Kadjy ne Metĩndjwÿnh amiwÿr ajuw. Kadjy ne ga me ipôkri memã katàt amijarēnh mex ne. Nã gãm memã kum,

—Be, arÿm ne ba tu amikajmã'ã Jeju markumrêx, ane. Nã gãm ane, nhym me apumũ. Kam ne ba amã,

—Arek amijo tēn kam atyk nhijukri atĩn rã'ã rã'ã rã'ã 'ÿr tu abôxkumrêx, ane.

¹³Ê, Metĩndjwÿnhmê Jeju Kritu ar kute ikabēn mar ne ikôt kabēnkam ne ba amã ikabēn jarē. Metĩndjwÿnh ne mÿjja kunĩo tĩn djwÿnh. Ta ne kute ikabēn mar ne ikôt kabēn. Kam ne ba amã ikabēn jarē. Nhym Kritu Jejudjwÿ kute katàt amijarēnh mexja, kute bēnjadjwÿrbê Pôxu Piratu kabem katàt amijarēnh mexja. Ar kute ikabēn mar ne ikôt kabēnkam ne ba amã ikabēn jarē ne amã,

¹⁴—Ê, gora prĩne ikabēn man kôt amijo aban kudjar kêt ne amrãnh mextire gē me ajã kabēn kêt. Dja ga mã ã anhÿro aba rã'ã nhym arÿm Jeju Kritu gu banhô Bēnjadjwÿr kato. ¹⁵Dja ô akati arÿm 'ÿr bôx nhym Metĩndjwÿnh dja kum arē nhym arÿm bôx. Nã, Metĩndjwÿnh ta pydji ne memã Bēnjadjwÿr rax ne meo ba. Atemã 'ô kêt. Metĩndjwÿnh umar mex ne kĩnhkumrêx tãm ne Bēnjadjwÿr raxbê kumkatiti. Kute bēnjadjwÿr raxo pykabê me bēnjadjwÿrja kunĩ jakrenh mexi. Kam ne kubê Bēnjadjwÿr raxbê kumkatiti: ne meo ba. ¹⁶Ajbit pydji ne tyk prãm kêtumrêx, tĩn rã'ã: tĩn djwÿnh. Ne irākam ar ba, arngrokam ar ba. Nãm kam axwe 'ô kêt. Kam gēdja me tēp kêtumrêx. Nhÿnh got me'ô arÿm noo omũ? Arkati. Me'ô kute noo omũnh kêtumrêx. Dja tũmrãm omũnh kêt rã'ã. Kumã dja me uma jarēnh rã'ã: rã'ã. Tãm dja me kàjmã kamēnh rã'ã rã'ã. Gēdja memã Bēnjadjwÿr ne meo ba rã'ã rã'ã. Mrãmri.

¹⁷Ê, me pykakam ô nêkrêx kumexmã dja ga,

—Amijo arax kêt. Djãm nêkrêx kute me apytarmã ne ga me nêkrêx kanàrrãm ar aba? Kati, kwãrik wãnh. Nêkrêx ne kajgo ne me abê biknor prãm. Kati, dja ga me Metĩndjwÿnh kanàrrãm ar aba. Metĩndjwÿnh ta ne kute ôdjànhkôt me bamã mÿjja kunĩ nhôr, o kute me bakĩnh kadjy, ta

kanàrràm dja ga me ar aba, ane. ¹⁸Gora me akabên mexbit jarẽ ne mekam adjukaprĩn ar meo aba, ne memã anhõdjàn nh ne memã anhõ mỳjja ngrà, ane.

¹⁹Dja ga ã me õ nêkrêx krãptĩjamã arênho ane gê me ã anen kam arỳm amityk nhijukri kadjy atemã kàjkwakam nêkrêxo aptà. Nêkrêx tãm ne mekbê biknor prãm kêt ne memã nõi rã'ã. Dja me kam arỳm 'ỳr bõx, mrãmri tu amitĩnkumrêx ja'ỳr bõx.

²⁰Ë, Ximoxi, Metĩndjwỳnh kute amã kukràdjà rerja gora prĩne omũ. Gora 'ãno djan omũnh tỳx. Me kabên kajgo, me kabên tũm dja wãnh nõ. Rũm kum akre rax. Nhym me 'êxri amijo kute mỳjja mar ne kam mỳr jabej abenkam kangati dja adjwỳnhdjwỳ wãnh nõ. ²¹Mrãmri ne me kwỳ kupa'ã,

—Ije mỳjja mar, anen kam ajbit mar ar o ba ne kam amibê arỳm Jeju mar kanga ne. Gê Metĩndjwỳnh ukaprĩkõt prĩne ajo djuw mex. Tãm ne ja.